

**AKASHVANI(AIR)**  
**RNU: KOLKATA**  
**Bengali Text Bulletin**

**23-05-2026**

**Time: 1.30 PM**

বিশেষ বিশেষ খবরঃ-

১) বিদেশমন্ত্রী ডঃ এস জয়শঙ্কর ভারত-মার্কিন যুক্তরাষ্ট্রের মধ্যে সম্পর্ক কেবলমাত্র এই দুই দেশের জন্যই নয়, সমগ্র বিশ্বের জন্যও বিশেষ গুরুত্বপূর্ণ।

# নতুন দিল্লিতে মার্কিন বিদেশসচিব মার্কো রুবিও-র সঙ্গে তাঁর প্রতিনিধি পর্যায়ের বৈঠক শুরু হয়েছে।

২) ইবোলা প্রাদুর্ভাবের প্রেক্ষিতে কেন্দ্রীয় সরকার ভারতীয় নাগরিকদের আফ্রিকার তিন দেশ, কঙ্গো, উগান্ডা এবং দক্ষিণ সুদানে ভ্রমণ না করার পরামর্শ দিয়েছে।

৩) হরমুজ প্রণালী পুনরায় খুলে দেওয়ার ব্যাপারে ইরানের সঙ্গে দীর্ঘমেয়াদি চুক্তি চূড়ান্ত করতে আলোচনায় অগ্রগতি হয়েছে বলে জানিয়েছেন মার্কিন রাষ্ট্রপতি ডোনাল্ড ট্রাম্প।

৪) পাকিস্তানের বেলিচিস্তান প্রদেশে কোয়েটার এক রেলস্টেশনে বিস্ফোরণে ৩০ জনের মৃত্যু।

৫) রাঁচিতে ফেডারেশন কাপ অ্যাথলেটিকস প্রতিযোগিতায় ১০০ মিটার দৌড়ে পুরুষ বিভাগে জাতীয় রেকর্ড করে সোনা জিতেছেন গুরুন্দরবির সিং।

৬) IPL ক্রিকেটে আজ মুম্বাই ইন্ডিয়ান্স, রাজস্থান রয়্যালসের বিরুদ্ধে, অন্য ম্যাচে কলকাতা নাইট রাইডার্স, দিল্লি ক্যাপিটালসের মুখোমুখি হবে।

০০০০০০০০০০০০০০০০০০০০০০০০০০০০

বিদেশমন্ত্রী ডঃ এস জয়শঙ্কর বলেছেন, ভারত-মার্কিন যুক্তরাষ্ট্রের মধ্যে সম্পর্ক কেবলমাত্র এই দুই দেশের জন্যই নয়, আন্তর্জাতিক ক্ষেত্রের জন্যও বিশেষ গুরুত্বপূর্ণ। নতুন দিল্লিতে মার্কিন বিদেশসচিব মার্কো রুবিও-র সঙ্গে প্রতিনিধি পর্যায়ের বৈঠকের আগে বিদেশমন্ত্রী বলেন, আন্তর্জাতিক ক্ষেত্রে বিভিন্ন বিষয়ে ভারত ও মার্কিন যুক্তরাষ্ট্রের স্বার্থ অভিন্ন এবং এই জটিল সময়ে দুদেশের মধ্যে আলোচনা গঠনমূলক ও সফল হবে শ্রী জয়শঙ্কর আশাপ্রকাশ করেন।

### বাইট-জয়শঙ্কর

মার্কিন বিদেশসচিব মার্কো রুবিও বলেছেন, ভারত, মার্কিন যুক্তরাষ্ট্রের অন্যতম গুরুত্বপূর্ণ কৌশলগত অংশীদার। তিনি বলেন, সন্ত্রাসবাদের কারণে উভয় দেশই ক্ষতিগ্রস্ত হয়েছে এবং আন্তর্জাতিক ক্ষেত্রে আগামী শতাব্দীর গুরুত্বপূর্ণ বিষয়গুলোতে ভারত ও মার্কিন যুক্তরাষ্ট্র কৌশলগতভাবে একমত।

### (বাইট - রুবিও)

কোয়াড বিদেশমন্ত্রীদের বৈঠকে যোগ দিতে, চার দিনের ভারত সফরে মার্কো রুবিও গতকাল এসে এদেশে এসেছেন। উল্লেখ্য, কোয়াড হল, ভারত, মার্কিন যুক্তরাষ্ট্র, জাপান এবং অস্ট্রেলিয়া এই চারটি দেশের নিরাপত্তা সহযোগিতা সংক্রান্ত একটি মঞ্চ। কোয়াড বিদেশমন্ত্রীদের বৈঠক আগামী ২৬ তারিখে শুরু হওয়ার কথা। এই বৈঠকে বিদেশমন্ত্রী ডঃ এস জয়শঙ্কর, অস্ট্রেলিয়ার বিদেশমন্ত্রী পেনি ওং, জাপানের বিদেশমন্ত্রী তোশিমিতসু মোতেগি ও মার্কো রুবিও বৈঠকে উপস্থিত থাকবেন। ‘উন্মুক্ত ভারত-প্রশান্ত মহাসাগরীয়’ অঞ্চল গড়ে তোলার লক্ষ্যে তাঁরা অগ্রাধিকারপ্রাপ্ত ক্ষেত্রগুলোতে সহযোগিতার বিষয়ে মতবিনিময় করবেন।

০০০০০০০০০০০০০০০০০০০০০০০০০০০০০০০০০০০০০০

ইবোলা প্রাদুর্ভাবের ক্রমপরিবর্তনশীল পরিস্থিতিতে ভারত সরকার সকল ভারতীয় নাগরিককে পরবর্তী নির্দেশ না দেওয়া পর্যন্ত ডেমোক্রেটিক রিপাবলিক অফ দ্য কঙ্গো,

উগান্ডা এবং দক্ষিণ সুদানে অপ্রয়োজনীয় ভ্রমণ না করার পরামর্শ দিয়েছে। পাশাপাশি বর্তমানে এই দেশগুলোতে বসবাসরত বা ভ্রমণরত ভারতীয় নাগরিকদের স্থানীয় কর্তৃপক্ষের জারি করা জনস্বাস্থ্য সংক্রান্ত নির্দেশিকা কঠোরভাবে মেনে চলতে এবং বাড়তি সতর্কতা অবলম্বন করতেও নির্দেশ দেওয়া হয়েছে। কেন্দ্রীয় স্বাস্থ্য ও পরিবার কল্যাণ মন্ত্রক জানিয়েছে ভারতে ইবোলা রোগের কোনো ঘটনা এখন পর্যন্ত শনাক্ত হয়নি।

উল্লেখ্য ডেমোক্রেটিক রিপাবলিক অফ দ্য কঙ্গো (DRC) এবং উগান্ডায় ইবোলা রোগের প্রাদুর্ভাবের পরেই বিশ্ব স্বাস্থ্য সংস্থা, WHO এই ইবোলা প্রাদুর্ভাবকে আন্তর্জাতিক উদ্বেগের জনস্বাস্থ্য জরুরি অবস্থা' হিসেবে ঘোষণা করেছিল।

oooooooooooooooooooooooooooo

পশ্চিমবঙ্গের দক্ষিণ ২৪ পরগনার ফলতা বিধানসভার পুনর্নির্বাচনে, বিজেপি প্রার্থী দেবাংশু পাণ্ডা এগিয়ে রয়েছেন।

ডায়মন্ড হারবার মহিলা বিশ্ববিদ্যালয়ে আজ সকাল ৮টা থেকে ভোটগণনা শুরু হলে, প্রথম রাউন্ড থেকেই তিনি বড় ব্যবধানে এগিয়ে যান।

১৩ রাউন্ড শেষে তিনি তাঁর নিকটতম প্রতিদ্বন্দ্বী বাম জোটের প্রার্থী শম্ভুনাথ কুর্মি-র চেয়ে ৫৮ হাজার ২৩৪ ভোটে এগিয়ে আছেন। গণনায় বিজেপি পেয়েছে ৮৭ হাজার ৩৬৭ ভোট। CPIM পেয়েছে ২৯ হাজার ১৩৩ ভোট।

oooooooooooooooooooooooooooo

সিকিম আনুষ্ঠানিকভাবে ব্রহ্মপুত্র বোর্ডের পূর্ণাঙ্গ সদস্য হিসেবে মনোনীত হয়েছে। সিকিম, ব্রহ্মপুত্র নদীর সুরক্ষা, সেচ ব্যবস্থা এবং বন্যা ব্যবস্থাপনা প্রকল্পের জন্য প্রায় ৩০০ কোটি টাকার প্রস্তাব জমা দিয়েছে বলে সরকারি সূত্রে খবর। গুয়াহাটিতে অনুষ্ঠিত বোর্ডের সাম্প্রতিক বৈঠকে এই সিদ্ধান্ত চূড়ান্ত করা হয়।

উল্লেখ্য, এর আগে, সিকিম শুধুমাত্র বিশেষ অতিথি হিসেবেই বৈঠকে অংশ নিত।

oooooooooooooooooooooooooooo

অল ইন্ডিয়া রেডিও-র ৯০তম বার্ষিকী উপলক্ষে, আজ আকাশবাণী কার্শিয়ং কেন্দ্র একটি ম্যারাথন দৌড়ের আয়োজনের মাধ্যমে আকাশবাণী@৯০ এর উদযাপন করছে। তিন কিলোমিটার দীর্ঘ এই দৌড়ে মহিলা ও পুরুষ মিলিয়ে পঞ্চাশেরও বেশি প্রতিযোগী অংশগ্রহণ করেন।

উলেখ্য ১৯৩৬ সালের ৮ই জুন প্রতিষ্ঠিত অল ইন্ডিয়া রেডিও ভারত-চীন যুদ্ধের কিছু পরেই ১৯৬২ সালে আকাশবাণী কার্শিয়ং কেন্দ্র স্থাপন করে।

oooooooooooooooooooooooooooo

হরমুজ প্রণালী পুনরায় খুলে দেওয়ার ব্যপারে ইরানের সঙ্গে দীর্ঘমেয়াদি চুক্তি চূড়ান্ত করতে বড় ধরনের অগ্রগতি হয়েছে বলে জানিয়েছেন মার্কিন রাষ্ট্রপতি ডোনাল্ড ট্রাম্প। তিনি জানিয়েছেন, ইসরায়েল এবং মধ্যপ্রাচ্যের অন্যান্য বন্ধু দেশগুলোর সঙ্গে আলোচনার পর এই চুক্তির বেশিরভাগ অংশই সম্পন্ন হয়েছে। নিজের সোশ্যাল মিডিয়া প্ল্যাটফর্ম 'ট্রুথ সোশ্যাল'-এ এব্যপারে ঘোষণা করে ট্রাম্প বলেন, চুক্তির শেষ মুহূর্তের খুঁটিনাটি বিষয়গুলো নিয়ে এখন আলোচনা চলছে এবং খুব শিগগিরই তা আনুষ্ঠানিকভাবে ঘোষণা করা হবে। এই বিষয়ে কথা বলতে ট্রাম্প ইসরায়েলের পাশাপাশি সৌদি আরব, সংযুক্ত আরব আমিরশাহী, কাতার, পাকিস্তান, তুরস্ক, মিসর, জর্ডান এবং বাহরাইনের নেতাদের সঙ্গেও আলোচনা করেছেন।

এদিকে, ইরানের বিদেশ মন্ত্রকের মুখপাত্র ইসমাইল বাঘাই সে দেশের সরকারি টেলিভিশনকে জানিয়েছেন, গত এক সপ্তাহে আমেরিকা ও ইরানের অবস্থান অনেকটাই কাছাকাছি এসেছে। মার্কিনদের বিরুদ্ধে পরস্পরবিরোধী বক্তব্য রাখারও অভিযোগ তোলেন তিনি।

oooooooooooooooooooooooooooo

মার্কিন যুক্তরাষ্ট্রের ক্যালিফোর্নিয়ায়, প্লাস্টিকের যন্ত্রাংশ তৈরিতে ব্যবহৃত একটি বিপজ্জনক রাসায়নিকের ট্যাঙ্ক থেকে রাসায়নিক ছড়িয়ে যাওয়ার কারণে ওই রাজ্যের গভর্নর গ্যাভিন নিউসম অরেঞ্জ কাউন্টিতে জরুরি অবস্থা ঘোষণা করেছেন। বিপজ্জনক রাসায়নিকের আরও একটি ট্যাঙ্ক বিস্ফোরণ থেকে বিপর্যয় এড়াতে, দমকলকর্মীরা বিশেষজ্ঞদের সাহায্য নিয়েছেন। লস অ্যাঞ্জেলেসের গার্ডেন গ্রোভ শহরের কয়েক হাজার মানুষকে নিরাপদ স্থানে সরিয়ে নেওয়ার নির্দেশ দেওয়া হয়েছে। সরিয়ে নেওয়া প্রায় ৫০,০০০ মানুষের জন্য অতিরিক্ত আশ্রয়কেন্দ্র খোলা হয়েছে।

০০০০০০০০০০০০০০০০০০০০০০

পাকিস্তানের বেলুচিস্তান প্রদেশের রাজধানী কোয়েটার 'চমন ফাটক' রেল স্টেশনের কাছে এক শক্তিশালী বিস্ফোরণে ২৪ জনের মৃত্যু হয়েছে, আহত হয়েছে বেশ কয়েকজন। বিস্ফোরণে সংলগ্ন এলাকায় থাকা ১০টি যানবাহনেরও পাশাপাশি একটি ট্রেন আংশিক ক্ষতিগ্রস্ত হয়েছে। রেল কর্তৃপক্ষ জানিয়েছে, বিস্ফোরণের পর সতর্কতামূলক ব্যবস্থা হিসেবে পেশাওয়ারগামী জাফর এক্সপ্রেসকে কোয়েটা রেলওয়ে স্টেশনে থামিয়ে দেওয়া হয়। বেলুচিস্তানের স্বরাষ্ট্রমন্ত্রীর মুখপাত্র বাবর ইউসুফজাই জানান, শহরে বিস্ফোরণের ঘটনার পর কোয়েটার সকল সরকারি হাসপাতাল সহ সংশ্লিষ্ট সকল প্রতিষ্ঠানকে সর্বোচ্চ সতর্ক করা হয়েছে।

০০০০০০০০০০০০০০০০০০০০০০

চিনের উত্তরাঞ্চলীয় Shanxi প্রদেশের Qinyuan কাউন্টির কয়লা খনিতে গ্যাস বিস্ফোরণের ঘটনায় নিহতের সংখ্যা বেড়ে ৮২ হয়েছে। শুক্রবার বিস্ফোরণের সময় ২৪৭ জন শ্রমিক খনিতে ছিলেন, যাদের মধ্যে দুই শ্রমিক এখনও নিখোঁজ।

ঘটনার পরেই চিনের রাষ্ট্রপতি শি জিনপিং দ্রুত উদ্ধার এবং আহতদের চিকিৎসার জন্য নির্দেশ দিয়েছেন।

চীনের খনি দুর্ঘটনায় প্রাণহানির ঘটনায় সামাজিক মাধ্যমের এক পোস্টে গতকাল প্রধানমন্ত্রী নরেন্দ্র মোদী গভীর শোক প্রকাশ করেছেন।

০০০০০০০০০০০০০০০০০০০০০০

১২৫ তম ফ্রেঞ্চ ওপেন আজ প্যারিসে শুরু হচ্ছে। ২৫তম গ্র্যান্ড স্ল্যাম শিরোপা জয়ের লক্ষ্যে নিজের অভিযান শুরু করবেন তিনবারের চ্যাম্পিয়ন এবং তৃতীয় বাছাই নোভাক জোকোভিচ। রোলা গাঁরোর 'কোর্ট ফিলিপ-শত্রিয়ে'-তে অনুষ্ঠিত সেশনের শুরুতে ফরাসী খেলোয়াড় জিওভানি এমপেতশি পেরিকার্ডের মুখোমুখি হবেন তিনি।

দ্বিতীয় বাছাই এবং ২০২৪ সালের ফাইনালিস্ট আলেকজান্ডার জভেরেভ ও সপ্তম বাছাই টেইলর ফিটজও প্রথম দিনে পুরুষদের সিঙ্গেলসের লড়াইয়ে নামবেন।

০০০০০০০০০০০০০০০০০০০০০০

ফিফার অনুমোদনের পর ইরানের ফুটবল দল ২০২৬ ফিফা বিশ্বকাপে তাদের বেস ক্যাম্প মার্কিন যুক্তরাষ্ট্র থেকে মেক্সিকোতে সরিয়ে নেওয়ার সিদ্ধান্ত নিয়েছে। ইরান ফুটবল ফেডারেশনের সভাপতি মেহদি তাজ এক বিবৃতিতে জানান টুর্নামেন্টের আধিকারিকদের সঙ্গে আলোচনার পর ফিফা তাদের এই অনুরোধে অনুমোদন দিয়েছে। ২০২৬ সালের ফিফা বিশ্বকাপ ১১ জুন থেকে ১৯ জুলাই, ২০২৬ পর্যন্ত মার্কিন যুক্তরাষ্ট্র, মেক্সিকো এবং কানাডার ১৬টি শহরে যৌথভাবে আয়োজিত হবে।

উল্লেখ্য বিশ্বকাপের সময় অ্যারিজোনার টাকসনের পরিবর্তে ইরান মেক্সিকোর তিজুয়ানায় অনুশীলন করবে।

০০০০০০০০০০০০০০০০০০০০০০

রাঁচিতে ফেডারেশন কাপ অ্যাথলেটিকস প্রতিযোগিতায় ১০০ মিটার দৌড়ে পুরুষ বিভাগে জাতীয় রেকর্ড করে সোনা জিতেছেন গুরুন্দরবির সিং। তিনি ১০ দশমিক শূন্য/নয় সেকেন্ডে দৌড় শেষ করেন। এর আগে তাঁর ব্যক্তিগত সেরা সময় ছিল ১০

দশমিক এক/সাত সেকেন্ড। কমনওয়েলথ গেমসে যোগ দেওয়ার জন্য যোগ্যতা মান ১০ দশমিক এক/ছয় সেকেন্ড। দ্বিতীয় স্থানাধিকারী অনিমেশ কুজুর দৌড় শেষ করেন, ১০ দশমিক দুই সেকেন্ডে। তিনি যোগ্যতা মান পার হতে ব্যর্থ হন।

০০০০০০০০০০০০০০০০০০০০০০

আই পি এল ক্রিকেটে আজ দুটি ম্যাচ রয়েছে। প্রথম ম্যাচে, বিকেল সাড়ে ৩টায় মুম্বাইয়ের ওয়াংখেড়ে স্টেডিয়ামে মুম্বাই ইন্ডিয়ান্স, রাজস্থান রয়্যালসের মুখোমুখি হবে। দ্বিতীয় ম্যাচে কলকাতার ইডেন গার্ডেন্সে কলকাতা নাইট রাইডার্স , দিল্লি ক্যাপিটালস এর বিরুদ্ধে খেলবে। খেলা শুরু হবে সন্ধ্য সাড়ে সাতটায়।

০০০০০০০০০০০০০০০০০০০০০০

৭৯তম বিশ্ব স্বাস্থ্য সম্মেলন গতকাল জেনেভায় শেষ হয়েছে। সম্মেলনে সদস্য রাষ্ট্রগুলি মানব স্বাস্থ্য সুরক্ষায় বহুপাক্ষিক সহযোগিতার বিষয়ে একাধিক প্রস্তাব গ্রহণ করেছে। সম্মেলনের মূল ভাবনা ছিল ‘আন্তর্জাতিক ক্ষেত্রে স্বাস্থ্য পুনর্গঠন: একটি যৌথ দায়িত্ব’।

০০০০০০০০০০০০০০০০০০০০০০

০০০০০০০০০০০০০০০০০০০০০০